

Embargo: Hanya boleh diterbitkan atau disebarkan mulai jam 1200, Khamis, 10 Julai 2025



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

STATISTIK TENAGA BURUH, MALAYSIA, MEI 2025

Bilangan penganggur terus menurun pada Mei 2025, merekodkan 522.4 ribu orang, dengan kadar pengangguran 3.0 peratus

PUTRAJAYA, 10 JULAI 2025 – Bilangan penganggur terus menurun pada Mei 2025, merekodkan 522.4 ribu orang, dengan kadar pengangguran 3.0 peratus, Jabatan Perangkaan Malaysia (DOSM) melaporkan hari ini dalam siaran **Statistik Tenaga Buruh, Malaysia, Mei 2025**. Statistik ini menerangkan situasi penawaran tenaga buruh negara berdasarkan Survei Tenaga Buruh yang dijalankan oleh DOSM.

Mengulas prestasi keseluruhan bagi Mei 2025, Dato' Sri Dr. Mohd Uzir Mahidin, Ketua Perangkawan Malaysia berkata, "Pasaran buruh negara pada Mei 2025 menunjukkan daya tahan dan penyesuaian yang baik terhadap perubahan ekonomi global dan teknologi. Penurunan pengangguran yang berterusan, diiringi pertambahan dalam guna tenaga, mencerminkan prestasi ekonomi Malaysia yang positif dan memberangsangkan. Oleh itu, bilangan tenaga buruh terus berada dalam trend menaik pada Mei 2025, dengan peningkatan bulan ke bulan sebanyak 0.2 peratus, mencatatkan 17.38 juta orang (April 2025: 17.34 juta orang). Kadar penyertaan tenaga buruh kekal tidak berubah iaitu pada 70.8 peratus, sama seperti bulan yang lalu."

Bilangan penduduk bekerja terus bertambah pada Mei 2025, naik sebanyak 0.3 peratus kepada 16.86 juta orang berbanding 16.82 juta orang yang direkodkan pada April 2025. Pada masa yang sama, bilangan penganggur terus menurun sebanyak 0.7 peratus kepada 522.4 ribu orang berbanding 525.9 ribu penganggur pada bulan sebelumnya. Kadar pengangguran pada bulan tersebut kekal 3.0 peratus seperti pada April 2025.

Dalam ulasannya mengenai trend guna tenaga terkini, Ketua Perangkawan Malaysia menyatakan bahawa kategori pekerja merangkumi 75.1 peratus daripada jumlah penduduk bekerja. Kategori ini merekodkan peningkatan sebanyak 0.2 peratus

mencecah kepada seramai 12.66 juta orang pada Mei 2025, berbanding 12.63 juta orang pada bulan sebelumnya. Begitu juga, bilangan penduduk bekerja sendiri mencatatkan peningkatan sebanyak 0.5 peratus kepada 3.18 juta orang berbanding 3.16 juta orang pada April 2025.

Melihat kepada prestasi guna tenaga mengikut sektor ekonomi, bilangan penduduk bekerja dalam sektor Perkhidmatan menunjukkan trend peningkatan yang konsisten, terutamanya dalam aktiviti Penginapan dan perkhidmatan makanan & minuman; Perdagangan borong dan runcit; dan aktiviti Pengangkutan & penyimpanan. Pada masa yang sama, sektor Pembuatan, Pembinaan, Pertanian, dan Perlombongan & pengkuarian turut merekodkan peningkatan dalam bilangan penduduk bekerja pada bulan tersebut.

Mengulas lebih lanjut situasi pengangguran pada Mei 2025, Dato' Sri Dr. Mohd Uzir Mahidin juga menjelaskan bahawa mereka yang bersedia untuk bekerja dan aktif mencari pekerjaan, atau penganggur aktif, merangkumi 79.7 peratus daripada jumlah penganggur. Pada bulan tersebut, bilangan penganggur aktif menurun sebanyak 0.5 peratus kepada 416.4 ribu orang (April 2025: 418.6 ribu orang). Mengikut tempoh pengangguran bagi penganggur aktif, 64.4 peratus meliputi mereka yang menganggur kurang daripada tiga bulan, manakala 5.1 peratus merupakan mereka yang berada dalam pengangguran jangka panjang melebihi setahun. Penganggur tidak aktif, atau mereka yang percaya bahawa tiada pekerjaan tersedia, turut menurun sebanyak 1.2 peratus, merekodkan 106.0 ribu orang berbanding bulan sebelumnya (April 2025: 107.2 ribu orang).

Kadar pengangguran bagi belia berumur 15 hingga 24 tahun turun kepada 10.2 peratus pada Mei 2025, dengan 297.7 ribu penganggur belia (April 2025: 298.3 ribu orang; 10.3%). Bagi belia berumur 15 hingga 30 tahun, kadar pengangguran kekal pada 6.2 peratus, mencatatkan bilangan penganggur belia seramai 399.0 ribu orang (April 2025: 400.6 ribu orang).

Bilangan penduduk di luar tenaga buruh meningkat sebanyak 0.1 peratus kepada 7.18 juta orang pada Mei 2025 berbanding 7.17 juta orang pada April 2025. Peratus sumbangan tertinggi penduduk di luar tenaga buruh adalah berikutan kerja rumah/ tanggungjawab keluarga iaitu sebanyak 43.7 peratus, diikuti oleh mereka yang terlibat dalam bersekolah/ latihan dengan 41.0 peratus.

Mengakhiri kenyataan tersebut, pasaran buruh negara dijangka akan terus berkembang dan kekal berdaya tahan pada bulan-bulan yang akan datang, disokong oleh dasar kerajaan, kestabilan makroekonomi, serta pelaburan dalam modal insan. Walaupun berdepan cabaran global yang berterusan, asas domestik yang kukuh dan pelaburan dalam modal insan membantu mengekalkan kestabilan dan prestasi pasaran buruh yang kukuh.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan'. Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Carta 1: Penduduk bekerja, Malaysia, Januari^r - Mei^r, November^r - Disember^r 2024, dan Januari - Mei 2025



Carta 2: Pengangguran, Malaysia, Januari^r - Mei^r, November^r - Disember^r 2024, dan Januari - Mei 2025



Carta 3: Luar tenaga buruh, Malaysia, Januari^r - Mei^r, November^r - Disember^r 2024, dan Januari - Mei 2025



Nota: ^r Semakan semula berdasarkan anggaran penduduk semasa daripada Banci Penduduk dan Perumahan Malaysia 2020

Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
10 JULAI 2025